

Poštovane kolegice i kolege,

Kako se bliži i vrijeme za završne ispite iz MPP II, a u nastojanju da vam, barem na ovaj posredan način dodatno olakšam pripremanje tog ispita, najprije vas podsjećam da prema našem ranijem dogovoru na nastavi, taj ispit obuhvata materiju izloženu na stranicama 101 (od podnaslova „2.4. Pravila o međunarodnoj nadležnosti i priznanju presuda u EU“) do 187 mog udžbenika, ili odgovarajuće dijelove udžbenika drugih autora iz regiona i šire.

Takođe vas podsjećam na naš dogovor o tome da u zahvat završnog ispita nužno ulazi par stranica iz MPP I o ulozi reciprociteta u MPP (stranice 115-118 mog udžbenika ili odgovarajuće stranice u udžbenicima drugih autora u regionu i šire.

Neki dijelovi online nastavnog materijala vam takođe mogu biti vrlo korisni, siguran sam da ćete ih vrlo lako prepoznati.

Na kraju, u nastavku možete vidjeti više primjera ispitnih pitanja i nekoliko primjera ispitnih zadataka, kako biste se upoznali sa profilom i karakterom završnog ispita.

Nekoliko pitanja *exempli causa*:

- Izvori pravila o međunarodnoj nadležnosti u Evropskoj Uniji.
- Sistem pravila o međunarodnoj nadležnosti u građanskoj i trgovačkoj materiji u Evropskoj Uniji.
- Režim priznavanja i izvršavanja stranih presuda u građanskoj i trgovačkoj materiji u Evropskoj Uniji.
- Pravila o međunarodnoj nadležnosti u materiji bračnih odnosa i materiji roditeljske odgovornosti za djecu u Evropskoj Uniji.
- Režim priznavanja stranih sudskih odluka u materiji bračnih odnosa i materiji roditeljske odgovornosti za djecu u Evropskoj Uniji.
- Potvrda o evropskom izvršnom nalogu.
- Ukoliko strani državljanin pokrene parnični postupak pred našim sudom, a tuženi podnese zahtjev za polaganje aktorske kaucije, da li će sud uvijek udovoljiti tom zahtjevu?
- Imaju li strani državljani pravo sticati vlasništvo na nekretninama u FBiH?
- Iz kojih bi razloga strani sud mogao odbiti postupanje po zamolnici našeg suda?
- Kako se kategorišu privatna prava s obzirom na njihovu dostupnost strancima?
- Može li stranom državljaninu biti uskraćeno pravo na besplatnu sudsku pomoć?
- Koje pravo je mjerodavno za ocjenu stranačke i parnične sposobnosti stranca u postupku pred sudom u BiH?
- Šta, najčešće, čini sadržaj zamolnice stranom sudu?

- Kojim je multilateralnim konvencijama BiH vezana u pogledu pružanja međunarodne pravne pomoći?
- Da li će na punovažnost oporuke (testamenta) pred našim sudom utjecati činjenica da je ostavilac u vrijeme smrti bio strani državljanin?

- Kakva su to „relativno dostupna“ privatna prava stranaca?

- Treba li, po Vašem mišljenju, dozvoliti uspostavljanje starateljstva nad štíćenikom koji je naš državljanin, od strane staratelja koji je strani državljanin?

- Objasnite značenje izraza „legalizacija strane javne isprave“.
- S kojim ciljem se pokreće mehanizam međunarodne pravne pomoći?
- Koje haške konvencije imaju, po vašem mišljenju, najveći praktični značaj u vođenju građanskog sudskog postupka u inostrano obilježenim predmetima?

- Može li zahtjev za polaganje aktorske kaucije, u postupku pred našim sudom, podnijeti tuženi koji nije državljanin BiH?

- Šta je zamolnica?

Nekoliko zadataka *exempli causa*:

- Opišite situaciju u kojoj bi naš sud mogao primijeniti institut prelevmana kod nasljeđivanja u inostrano obilježenom nasljednopravnom slučaju.

- Kratko obrazložite važnost Haške konvencije o ukidanju potrebe legalizacije stranih javnih isprava (1961.),

- Stranka je u građanskom sudskom postupku pred našim sudom, kao dokazno sredstvo predložila stranu javnu ispravu. Da li će je sud uvažiti?

- U parničnom postupku pred našim sudom, tuženi je na pripremnom ročištu, podnio zahtjev za polaganje aktorske kaucije, pošto je tužilac strani državljanin bez prebivališta u BiH. Sud je odredio visinu kaucije i rok za njeno polaganje. Tužilac u roku koji je određen nije uplatio kauciju. Kakva će procesna situacija tada nastati?

Znam da su vaši ispitni rasporedi komplicirani i tijesni i da ćete biti opterećeni, ali se nadam da ste uspjeli iskoristiti vrijeme smanjene nastavne aktivnosti, te da ćete u kampanju završnih ispita ući sa puno stečenog znanja i samim tim relaksirano i uspješno.

Svima vama drage kolegice i kolege, želim puno uspjeha i radujem se našim razgovorima, nakon dužeg vremena u kojem za to nije bilo prilike.

Uz srdačan pozdrav,

Prof. dr E.Muminović m.p.

P.S. Koristim ovu priliku da vam skrenem pažnju na obavještenje o načinu polaganja parcijalnog ispita iz MPP II koje će biti postavljeno na stranicu Fakulteta u ponedjeljak, 01.06.2020. godine.